



# Lescha da taglia

## M e s s a d i

per la radunonza communalala dils 28 d'avrel 2008

tractanda 5

# Messadi: Lescha communal da taglia

## 1. Punct da partenza

Cun la nova constituziun cantunala ha il dretg fiscal communal obteniu in niev fundament legal. Fertun che las vischnauncas han entochen oz in dretg costituziunal sin in'atgna autonomia fiscal, maunca ina stipulaziun corrispundenta ella nova constituziun cantunala. Las vischnauncas obtegnan da niev lur autonomia fiscal entras la lescha davart las taglias communalas e davart las taglias da baselgia dil cantun Grischun (DG 720.200), approvada ils 31 d'uost 2006 dil Cussegl grond e passada igl emprum da schaner 2008 en vigur.

La nova lescha cantunala regla ina gronda part dil dretg fiscal dallas vischnauncas. Perquei ston tuttas vischnauncas reveder lur leschas da taglia e sutmetter ellas ***entochen sil pli tard ils 31 da fenadur 2008 alla Regenza per approvaziun.***

La davosa revisiun dalla lescha da taglia dalla vischnaunca Sumvitg ei vegnida approvada ils 17 da settember 2001 entras la radunonza communal. Ella ei – suenter l'approvaziun dalla Regenza - entrada en vigur igl emprum da schaner 2002. Sin fundament dalla situaziun nova ei ina revisiun totala inevitabla.

## 2. Consideraziuns generalas

La lescha cantunala davart las taglias communalas e davart las taglias da baselgia simplifichescha considerablamein il dretg fiscal communal, demai che grondas parts vegnan regladas sin palancau cantunal. Ei settracta oravontut dil suandont:

- Las cumpetenzas vegnan mintgamai regladas els puncts essenzials pli clar e precis e pliras stipulaziuns vegnan adattadas alla realitad giuridica actuala.
- Differentas specias da taglia, applicadas pli u meins dapertut, vegnan regladas definitivamein ella nova lescha cantunala. Talas determinaziuns vegnan cheutras buca menziunadas pli explicit ella lescha communal. Aschia vegn la lescha communal bia pli cuorta e pli surveseivla.
- L'applicaziun e l'interpretaziun dalla lescha communal da taglia ha el futur da succeder strictamein tenor la lescha cantunala; plinavon eisi fixau da niev, che la lescha cantunala da taglia vegn - conform al senn – applicada leu, nua che las leschas da taglia communalas e la lescha cantunala davart las taglias communalas e davart las taglias da baselgia cuntengnan neginas determinaziuns.

Cheutras piardan las vischnauncas senza dubi empau da lur autonomia. Da l'autra vart augmenta quella nova sligaziun la segirtad giuridica e simplifichescha il dretg fiscal.

Ei settracta d'ina revisiun totala. Quei s'exprima gia ella fuorma. Fertun che la lescha actuala dumbra 49 artechels, ha la nova mo pli 21 artechels; pia ina considerabla simplificaziun. La vischnaunca sa practicamein mo pli decider davart la taglia d'ierta e da donaziuns sco era davart la taglia da tgauns e fixar il pei da taglia.

## **2.1 Taglia sin las entradas e sin la facultad**

La lescha davart las taglias communalas e davart las taglias da baselgia dil cantun Grischun regla definitiv las taglias sin las entradas e sin la facultad. Las vischnauncas ein obligadas d'imponer ina taglia sin las entradas e sin la facultad. Ellas san sulettamein dessignar l'autorità cumpetenta per la taxaziun e fixar il pei da taglia.

## **2.2 Taglia sin gudogn entras la vendita da schischom**

Era quella taglia vegn reglada definitiv entras las stipulaziuns cantunalas. Gnanc l'altezia da quella taglia astga la vischnaunca fixar. Ella ei denton obligada d'imponer ina taglia ella medema altezia sco la taglia cantunala.

## **2.3 Taglias sin midada da maun e sin schischom**

Era las taglias sin midada da maun e sin schischom vegnan regladas a moda definitiva entras la lescha cantunala. Las vischnauncas san denton decider libramein, schebein ellas vulan imponer quellas duas taglias ni buc. Aschinavon ch'ellas fan quei, ein ellas obligadas da risguardar las determinaziuns dalla lescha cantunala.

## **2.4 Taglia d'ierta e da donaziuns**

Il cantun impona la taglia sin relasch (la taglia vegn imponida sin la facultad totala), ferton che las vischnauncas imponan ina taglia sin la quota d'ierta (pia sin la quota che vegn assignada al pagataglia). La lescha davart las taglias communalas e davart la taglia da baselgia dil cantun determinescha sulettamein il principi e surlai la concretisaziun allas vischnauncas.

## **2.5 Taglia da tgauns**

En quella domena ha la vischnaunca cumpleina libertad da relaschar prescripziuns.

## **2.6 Taxa da cura e taxa per promover il turissem**

Cheu setracta ei da mesiras per promover il turissem che vegnan praticadas dapi liung temps eche ein secumprovadas.

Tenor artechel 27, al. 2 dalla lescha cantunala davart las taglias communalas e davart las taglias da baselgia ei la suprastanza communal buca pli l'istanza da recuors. En quei senn sto il reglament taxas da cura e contribuziuns per promover il turissem (DC 330.000) vegnir adattaus entochen igl'emprem da schaner 2009.

## **2.7 Dretg processual**

Tenor la lescha cantunala sto la vischnaunca determinar en sia lescha tgi ch'ei cumpetents per la taxaziun ed igl incasso (inclusiv levgiaments da pagament), per revisiuns, castitg disciplinars, taglia penala (Nach- und Strafsteuern) eav.

## **3. Applicaziun per la vischnaunca**

Sco ei seresulta dallas declaraziuns precedentas ha la vischnaunca buca grondas pusseivladads d'agir. Concernent la taglia sin las entradas e sin la facultad essan nus obligai da risguardar strictamein las determinaziuns cantunalas.

En vesta alla situaziun finanziaria stuein nus mantener las taglias specialas sco tochen dacheu. Quei vala en emprema lingia per la taglia sin midada da maun. Quella resta cun dus procents sco tochen dacheu e corrispunda alla reglamentaziun dil pli dallas vischnauncas.

La taglia sin schischom ei secumprovada e necessaria. Ella vegn medemein imponida en praticamein tuttas vischnauncas. Il pei da taglia variescha denter in e dus promils. Ei cunvegn da mantener ina certa flexibilitad cun indicar ina quota maximala ella lescha. Il pei da taglia concret vegn mintgamai fixaus digl organ cumpetent, gest sco tier il pei da taglia per la taglia sin las entradas.

Adattaziuns ein necessarias tier la taglia sin la quota d'ierta e la taglia sin donaziuns. Cheu propona la suprastanza communal da deliberar il conjugal survivent, ils partenaris registrai, ils partenaris da concubinad ed ils geniturs sco era dils vegnentsuenter directs (incl. figliasters, affons confidai sco era lur descendents) dalla taglia sin la quota d'ierta. La parantella pli allontanada duei denton vegnir constrenschida commensuradamein; quei era en cumparegliaziun cun autras vischnauncas. Visavi il sistem actual da taxaziun dat ei buca grondas midadas.

La taglia da tgauns resta en principi sco tochen dacheu. Conform a nossa devisa fundamentala, sespruein nus da simplificar las proceduras administrativas ton sco pusseivel.

#### **4. Levgiaments finanziarials**

La nova structura dallas tariffas ed il descargament dils conjugals e dallas famiglias tenor la lescha cantunala da taglia porta in levgiament per tut ils pagataglia, oravontut per tals en scalems bass dalla progressiun. Ella media astgan ins quintar che quellas adattaziuns e reduziuns tenor la lescha cantunala portan in levgiament per il pagataglia da rodund 8 procents. *Era tier la taglia communal profitschan vischinas e vischins automaticamein da quels levgiaments.*

Per proprietaris da schischom sedat plinavon ina remedura tier il sistem da risguardar ils cuosts da manteniment dallas immobilias. Sco gia tier la taglia federala sa vegnir elegiu mintg'onn d'indicar u ils cuosts effectivs ni ina pauschala.

Per biaras vischnauncas ein ils levgiaments respectivamein las reduziuns dallas entradas efectuadas entras la nova lescha cantunala da taglia supportablas. En vischnauncas nua che quei ei buca il cass, dat la lescha davart las taglias communalas e dallas taglias da baselgia allas vischnauncas la pusseivladad da fixar il pei da taglia maximal per la taglia sin schischom a dus promils.

#### **5. Consideraziuns giuridicas**

La cumpetenza per l'approbaziun dalla lescha communal da taglia cumpeta alla radunonza communal. La proposta dalla suprastanza communal sebase sin in model d'ina lescha communal da taglia, recumandaus dall'administraziun cantunala da taglia.

Suenter l'approbaziun dalla lescha entras la radunonza communal basegna la lescha l'approbaziun entras la Regenza e passa pér silsuenter en vigur. La preexaminaziun

entras l'administraziun cantunala da taglia ei denton gia succedida e las objecziuns fatgas ein vegnidas risguardadas.

Tenor las directivas cantunalas duei la nova lescha communal da taglia entrar igl 1. da schaner 2009 en vigur.

## **6. La taglia da cumin croda**

Sebasond sin la nova constituziun cantunala astgan ils cumins buca incassar pli ina taglia. Naven dall'entschatta 2009 ston las vischnauncas financiar il deficit dils uffecis circuitals. La taglia circuitala munta actualmein a dus procents dalla taglia cantunala. Igl onn 2006 han ils pagataglia da Sumvitg pagau rodund frs. 39'000 taglia da cumin. Leutier vegn la cumpart dallas personas giuridicas, aschia ch'ei sedat in importo total pil cumin da rodund frs. 45'000. Era quella midada da sistem sto vegnir risguardada ellas calculaziuns da taglia dils proxims onns.

## **7. Il sconto sin las taglias**

La pusseivladad da trer a nez il tscheins per in pagament anticipau (sconto), sche la taglia vegn pagada avon che la scadenza ha entschiet, ei buca pli previda el niev sistem d'incassament dil cantun. Ei setracta cheu d'in surpli d'entradas annual da rodund frs. 22'000. La suprastonza communal propona alla radunonza communal da cumpensar cun quei surpli d'entradas ina part dallas obligaziuns finanzialas supplementaras dalla vischnaunca che stattan en connex cun la midada da sistem tier la taglia da cumin.

## **8. Consideraziuns finalas**

Cun la revisiun proponida vegn il sistem e la legislaziun communal en fatgs da taglia midaus e simplifiaus grondamein. Las directivas essenzialas ein fixadas ellas novas leschas cantunalas che nus havein d'observar e d'applicar. Cheutras vegnan las pusseivladads dalla vischnaunca denton restrenschidas. La simplificaziun e la trasparenza augmentada dil sistem fiscal ein denton da grond avantatg.

La nova lescha communal da taglia porta als pagataglia praticamein neginas greveziass supplementaras.

Anzi: Entras ils levgiaments dalla lescha cantunala da taglia, seresultan automaticamein era considerabels levgiaments per la taglia communal. Consequentamein dat ei, abstrahau dalla taglia d'ierta, dameins entradas per la cassa communal. In augment dallas entradas ei mo pusseivels cun l'adattaziun dil pei da taglia che la radunonza communal ha decidiu il december vargau.

Annexas:

- Lescha da taglia
- Commentari





vischnaunca da  
**sumvitg**

**SBOZ**  
**per radunonza communal**  
**Lescha da taglia**

**900.000**

## C u n t e g n

---

<b>I.</b>	<b>Disposiziuns generalas</b>	<b>3</b>
Art. 1	Object	3
Art. 2	Dretg subsidiar	3
<b>II.</b>	<b>Dretg material</b>	<b>3</b>
	<b>Taglia sin las entradas e sin la facultad</b>	<b>3</b>
Art. 3	Pei da taglia	3
	<b>Taglia sin midada da maun</b>	<b>3</b>
Art. 4	Tariffa da taglia	3
	<b>Taglia sin schischom</b>	<b>4</b>
Art. 5	Tariffa da taglia	4
	<b>Taglia sin la quota d'ierta ed ina taglia sin donaziuns</b>	<b>4</b>
Art. 6	Objects e fixaziuns	4
Art. 7	Subject	4
Art. 8	Deliberaziun subjectiva dalla taglia	4
Art. 9	Calculaziun dalla taglia	4
Art. 10	Incassament e responsabladad	5
	<b>Taglia da tgauns</b>	<b>5</b>
Art. 11	Object da taglia	5
Art. 12	Subject da taglia	5
Art. 13	Deliberaziun da taglia	5
Art. 14	Calculaziun dalla taglia	5
<b>III.</b>	<b>Dretg formal</b>	<b>6</b>
	<b>Autoritads</b>	<b>6</b>
Art. 15	Suprastonza communal	6
Art. 16	Uffeci communal da taglia	6
	<b>Incassament</b>	<b>6</b>
Art. 17	Scadenza	6
Art. 18	Termin da pagament	6
Art. 19	Relasch ed amortisaziun administrativa da taglia	7
	<b>Indemnisaziun</b>	<b>7</b>
Art. 20	Indemnisaziun per incassament	7
<b>IV.</b>	<b>Disposiziuns finalas</b>	<b>7</b>
Art. 21	Entrada en vigur	7

## I. Disposiziuns generalas

---

### Art. 1 Object

<sup>1</sup> La vischnaunca da Sumvitg impona las suandontas taglias tenor las disposiziuns dil dretg cantunal:

- a) ina taglia sin las entradas e sin la facultad;
- b) ina taglia sin gudogn entras la vendita da schischom;
- c) ina taglia supplementara ed ina taglia penala sco era multas disciplinaras;
- d) ina taglia sin midada da maun;
- e) ina taglia sin schischom.

<sup>2</sup> La vischnaunca da Sumvitg impona las suandontas taglias tenor questa lescha:

- a) ina taglia sin la quota d'ierta ed ina taglia sin donaziuns;
- b) ina taglia da tgauns.

<sup>3</sup> La vischnaunca da Sumvitg impona plinavon las suandontas taglias tenor la legislaziun speciala:

- a) ina taxa da cura
- b) ina taxa per promover il turissem

### Art. 2 Dretg subsidiar

Aschilunsch che questa lescha cuntegn negina regulaziun, vegnan las disposiziuns dalla lescha davart las taglias communalas e davart las taglias da baselgia sco era dalla lescha cantunala da taglia applicadas conform al senn.

## II. Dretg material

---

### Taglia sin las entradas e sin la facultad

#### Art. 3 Pei da taglia

<sup>1</sup> La taglia sin las entrada e sin la facultad vegn imponida en ina procentuala dalla taglia cantunala sempli.

<sup>2</sup> La radunonza communal fixescha il pli tard il december il pei da taglia per igl onn fiscal suandont.

### Taglia sin midada da maun

#### Art. 4 Tariffa da taglia

La taglia sin midada da maun importa 2 %.

## **Taglia sin schischom**

### **Art. 5 Tariffa da taglia**

<sup>1</sup> La taglia sin schischom importa maximal 2 promils.

<sup>2</sup> La radunonza communal fixescha il pli tard il december il pei da taglia per igl onn fiscal suandont.

## **Taglia sin la quota d'ierta ed ina taglia sin donaziuns**

### **Art. 6 Objects e fixaziuns**

<sup>1</sup> Alla taglia sin la quota d'ierta e sin donaziuns ei suttamess mintga augment da facultad ch'effectuescha ina taglia cantunala sin ierta respectivamein sin donaziuns.

<sup>2</sup> Las valurs da facultad suttamessas alla taglia e la fixaziun dalla taglia sedrezzan tenor las prescripziuns cantunalas.

<sup>3</sup> Sche l'assignaziun consista d'ina gudida ni d'ina prestaziun che serepeta, ei la valur capitalisada decisiva per la taxaziun.

### **Art. 7 Subject**

Obligai da pagar taglia ei il retschevider dall'assignaziun,

- a) sch'il testader respectivamein il donatur era domiciliaus ella vischnaunca da Sumvitg il mument da sia mort respectivamein il mument dalla conderschida dall'assignaziun; reselvau ei quella part digl augment da facultad che consista da schischom che sesanfla buca sin il territori communal;
- b) sche l'assignaziun consista da schischom sin il territori communal ni en dretgs reals vi da tals.

### **Art. 8 Deliberaziun subjectiva dalla taglia**

Deliberai dalla taglia sin la quota d'ierta e dalla taglia sin donaziun ein:

- a) il conjugal survivent;
- b) ils partenaris registrai;
- c) ils descendents, ils figliasters ed ils affons confidai sco era lur descendents;
- d) las personas ch'ei deliberadas dalla taglia sin midada da maun tenor il dretg cantunal;
- e) ils partenaris da concubinat;
- f) ils geniturs.

### **Art. 9 Calculaziun dalla taglia**

<sup>1</sup> Per calcular la taglia vegn deduciu:

- |  |                   |
|--|-------------------|
| a) dallas assignaziuns a personas basignusas | 14'000.-- francs; |
| b) da mintg'otra assignaziun                 | 7'000.-- francs.  |

<sup>2</sup> Ils imports fixai ell'alinea 1 ein indexai.

<sup>3</sup> En cass d'ina obligaziun parziala da pagar taglia vegnan las deducziuns concedidas proporziunalmein.

<sup>4</sup> En cass da pliras assignaziuns al medem retschevider entras la medema persuna sa igl importo liber da taglia vegnir pretendius mo inaga enteifer ina perioda da tschun onns.

<sup>5</sup> La taglia importa

- a) per il tschep dils geniturs 5 %;
- b) per il tschep da tat e tatta 10 %;
- c) per las ulteriuras persunas beneficiadas 15 %.

## **Art. 10 Incassament e responsabladad**

<sup>1</sup> La taglia sin la quota d'ierta ei da pagar ord il relasch avon sia repartiziun e vegn incasada per tut ils artavels sco era per tut ils legataris en ina suletta gada.

<sup>2</sup> Plirs retscheviders d'assignaziuns stattan solidariamein buns per la taglia entochen igl import da lur augment da facultad.

<sup>3</sup> Igl administratur dall'ierta numnaus officialmein ni dessignuas dils artavels e gl'executur dil testament stattan buns solidariamein per la taglia entochen igl import dil relasch sco tal.

## **Taglia da tgauns**

### **Art. 11 Object da taglia**

Per mintga tgaun ch'ei pli vegls che treis meins e che vegn tenius sin territori communal ei da pagar ina taglia.

### **Art. 12 Subject da taglia**

Obligaus da pagar taglia ei il possessur dil tgaun. Il possessur ei obligaus d'annunziar siu animal alla vischnaunca enteifer 30 dis.

### **Art. 13 Deliberaziun da taglia**

Deliberai da pagar la taglia ein possessurs per

- a) tgauns da polizia;
- b) tgauns da lavina;
- c) tgauns per tschocs e suords.

### **Art. 14 Calculaziun dalla taglia**

<sup>1</sup> La taglia importa pigl empren tgaun 75.-- francs, per mintg'ulteriur tgaun ella medema casada 200.-- francs per onn. La suprastonza communal ei cumpetenta d'adattar quellas tariffas alla carischia

<sup>2</sup> Sch'il tgaun vegn buca tenius duront igl entir onn sil territori communal, vegn la taglia debitada mo pro rata, denton silmeins per treis meins.

<sup>3</sup> La taglia sto vegnir pagada annualmein tier la retratga dalla marca da tgauns.

<sup>4</sup> La marca sa vegnir remplazzada entras in auter sistem da controlla.

### **III. Dretg formal**

---

#### **Autoritads**

##### **Art. 15 Suprastonza communal**

La suprastonza communal decida:

- a) davart damondas da levgiament fiscal;
- b) davart la participaziun a cunvegns da dretg vicendeivel dil cantun en caussas da taglia sin l'ierta e sin donaziuns.

##### **Art. 16 Uffeci communal da taglia**

<sup>1</sup> L'execuziun da questa lescha ei caussa digl uffeci communal da taglia, aschilunsch che la vischnaunca ei cumpetenta persuerter.

<sup>2</sup> Igl uffeci communal da taglia ei ultra da quei cumpetents per l'execuziun dallas incumbensas che la lescha cantunala da taglia ha surdau allas vischnauncas.

<sup>3</sup> La vischnaunca sa delegar a tiazas personas sias incumbensas tenor las alineas 1 e 2.

#### **Incassament**

##### **Art. 17 Scadenza**

<sup>1</sup> Las taglias sin entradas e sin facultad scadan la fin digl onn fiscal.

<sup>2</sup> La scadenza dalla taglia sin schischom sedrezza tenor las taglias directas, sch'ella vegn incassada ensemen cun quellas.

<sup>3</sup> La scadenza dalla taglia sil gudogn entras la vendita da schischom sedrezza tenor il dretg cantunal.

<sup>4</sup> Las ulteriuras taglias sco era las multas disciplinaras scadan cun la facturaziun.

<sup>5</sup> Alla fin dall'obligaziun da pagar taglia en Svizra ni cun la declaraziun da concuors scada mintga taglia ni mintga multa immediatamein.

##### **Art. 18 Termin da pagament**

<sup>1</sup> Cun resalva dad alinea 2 ein las taglias e las multas disciplinarias da pagar enteifer 90 dis dapi la scadenzas.

<sup>2</sup> Il termin da pagament dalla taglia sin il gudogn entras la vendita da schischom sedrezza tenor il dretg cantunal.

<sup>3</sup> La taglia sin schischom incassada separadamein ei da pagar enteifer 30 dis dapi la scadenza.

<sup>4</sup> Per las taglias sin las entradas e sin la facultad sco era per la taglia sin schischom incassada ensemen cun quellas sa la suprastonza communal decide in pagament en ratas per igl'onn che suonda gl'onn fiscal.

<sup>5</sup> Alla fin dall'obligaziun da pagar taglia en Svizra ni a caschun dalla declaraziun da concurs scada mintga taglia ni mintga multa immediatamein.

### **Art. 19 Relasch ed amortisaziun administrativa da taglia**

Davart las damondas da relasch e davart las amortisaziuns administrativas decidan:

- a) gl'uffeci communal da taglia entochen gl'import da 1'000.-- francs;
- b) la suprastonza communal per ils imports che survargan la summa suramenziunada.

## **Indemnisaziun**

### **Art. 20 Indemnisaziun per incassament**

La vischnaunca da Sumvitg vegn indemnisada dallas baselgias cantunales e las pleivs cun 2 % dallas taglias incassadas.

## **IV. Disposiziuns finalas**

---

### **Art. 21 Entrada en vigur**

<sup>1</sup> La lescha ei vegnida acceptada ils ..... dalla radunonza communal. Ella entra en vigur ils 1. da schaner 2009 e remplazza la lescha da taglia communal dils 1. da schaner 2002.

<sup>2</sup> Cun l'entrada en vigur da questa lescha ein tut las disposiziuns dalla vischnaunca che stattan en contradicziun cun ella abrogadas.

# Commentari

## *Art. 1*

Quei artechel enumerescha tuttas specias da taglia che la vischnaunca ei legitimada d'imponer.

## *Art. 3*

Las modalitads dalla taglia vegnan determinadas definitiv entras la lescha cantunala.

## *Art. 4*

La taglia sin midada da maun astga tenor la lescha davart las taglias communalas e davart las taglias da baselgia muntar a maximalmein dus procents. Nus applichein ils dus procents. Quei corrispunda pli u meins all'altezia dallas autras vischnauncas.

## *Art. 5*

Tenor las directivas cantunalas astga la tariffa buca survargar dus promils. Ella Cadi variescha quella tariffa denter in e dus promils.

Il pei da taglia vegn fixaus onn per onn en connex cun la tractaziun dil preventiv, aschia ch'igl organ competent sa en tutta libertad adina puspei s'adattar alla situaziun actuala.

## *Art. 6*

Tier la taglia d'ierta vegn, abstrahau dalla tariffa, manteniu il sistem secumprovas.

## *Art. 8*

Demai ch'ils partenaris da concubinats ein el futur deliberai dalla taglia sin relasch, cunvegn ei d'era deliberar els dalla taglia communal d'ierta. Per ils geniturs stipulescha la lescha cantunala in importo liber (assegnaziun) da frs. 100'000.--. La suprastanza communal ei denton dil meini d'era deliberar ils geniturs da quella taglia. Tenor la pratica setracta ei da fetg paucs cass.

Las personas deliberadas dalla taglia conform a lit. d sedrezzan tenor artechel 11 dalla lescha davart las taglias communalas e davart las taglias da baselgia. Leu vegnan las excepziuns enumeradas detagliadamein.

## *Art. 9*

Ils importos libers corrispundan alla legislaziun cantunala. La vischnaunca ha denton la libertad da far midadas.

## *Art. 14*

Actualmein vegn incassau 50 francs per tgaun. En vesta alla discussiun sin palancau naziunal ei ina adattaziun indicada, en special leu nua ch'ins posseda plirs tgauns. Il cantun recomonda d'applicar la stipulaziun dalla lescha da model e d'imponer la taglia pro rata. Quei seigi la formulaziun usitada. Cass cuntrari savess ei dar problems el mument d'ina midada dil domicil en quei senn, che la taglia vegness imponida duas gadas.

## *Art. 16*

La taxaziun dalla taglia sin schischom succeda ensemen culla taxaziun per la taglia sin entrada e facultad entras igl uffeci communal tenor las indicaziuns digl uffeci cantunal.

## *Art. 19*

Daniev ha igl uffeci communal la cumpetenzza da decider davart damondas da relasch e davart amortisaziuns administrativas entochen igl importo da frs. 1'000 per cass.

## *Art. 20*

Actualmein incassescha la vischnaunca dus procents per igl incasso dallas taglias da baselgia. Tenor la nova lescha cantunala astga quella indemnizaziun buca survargar 2.5 procents.